

22/07/2002

Koperasi boleh jana ekonomi, sosial rakyat

KUALA LUMPUR, Ahad - Datuk Seri Dr Mahathir Mohamad berkata, sektor koperasi mampu menjadi jentera pembangunan negara bukan saja daripada aspek ekonomi malah pembangunan sosial dan sahsiah masyarakat.

Perdana Menteri berkata, peranan itu boleh dimainkan jika sektor koperasi dapat digembleng dengan optimum dan efektif.

"Saya percaya gerakan koperasi boleh memainkan peranan yang lebih berkesan lagi bukan saja dalam memenuhi keperluan anggotanya, malah boleh memainkan peranan yang lebih berguna dalam menyumbang terhadap pembangunan negara," katanya.

Beliau berkata demikian dalam kata-kata aluan pada buku cendera mata sempena pelancaran Hari Koperasi Negara 2002.

Pelancaran itu dilakukan oleh Timbalan Perdana Menteri, Datuk Seri Abdullah Ahmad Badawi di Dewan Merdeka, Pusat Dagangan Dunia Putra (PWTC) di sini, hari ini.

Dr Mahathir berkata, sambutan Hari Koperasi Negara itu diharap akan menjadi penggerak ke arah kemajuan gerakan koperasi di negara ini dan ia penting bagi meningkatkan kesedaran di kalangan rakyat.

Beliau mengucapkan tahniah dan syabas kepada Kementerian Tanah dan Pembangunan Koperasi atas usaha mengadakan sambutan itu buat kali pertama untuk memperingati sumbangan gerakan koperasi kepada masyarakat.

"Saya mengucapkan selama maju jaya kepada koperasi-koperasi di negara kita dan semoa ia akan dapat berkembang dengan lebih pesat pada masa hadapan," katanya.